

四庫全書

集部

欽定四庫全書

霞外詩集卷七

元 馬臻 撰

讀盛明卿藏書目

嘗聞張華博羣書祕府因之得精選李邕豈為芸閣謀
苦恨無書讀未徧古來志士守蓬蒿閉戶不識春風面
一生汲汲竟不伸思爾令人臉常覲先王大道周孔業
百氏森森則墳典吳中盛氏表明卿結構雄樓藏萬卷
義方之教誠惟精研玄咀騷天為成須知種德在根柢

鄉里稱善非虛名想當探討潛沉冥隱隱八窗金石聲
排雲毛質匪難取翻笑白頭窮一經衰年覽勝錯驚喜
不意短髮秋飄零他時經濟看公等此語當為知者聽

蕉池舊業

仙子神遊浩劫家閑門深掩夕陽斜尚思來鶴盤清漢
不復飛章出太霞挂劒枝空懷季札草玄人去老侯芭
誰憐池上甘蕉樹曾向春風幾度花

畫青山白雲圖

每見青山即解顏生平不道住山難
和雲數畝無錢買
投老傳來畫裏看

冬菊

三逕荒蕪冷未分尚留秋色在籬根
盈枝香老爭霜力
遶砌叢低上凍痕芳芷不禁甘委質
早梅如見斷消魂
又輸彭澤饒詩興雪滿南山酒一樽

喜蝶

謾拋心力為人忙百計難消兩鬢霜
羨殺西風白蝴蝶

遂遂相相學蒙莊

京口逢友人

居庸關外何年別揚子江頭此日逢語罷憑君一回首
雲山知隔幾多重

題畫卷四首

翠疊洪濛色雲凝淡沲春高寒不可到應有採芝人
風雨撼不動亭亭萬物表憶得定回時霜鐘數聲曉
拳石蹲蒼煙踈篁倚寒碧仙人筆有神山鬼為辟易

古色仍凝素幽人似造玄水窮雲起處不語看青天

和袁德平見寄韻

肯來相顧散幽襟疎懶還容此重尋有道合歸高士傳
論文今見古人心江湖短景催寒事風雨孤燈入夜吟
自昔吾廬山水裏幾看春色上來禽

為翁子善作晴江圖

故人遺我清江縣裏一疋紙白光晶熒心所好幾欲寫
作晴江圖塵土昏人意不到竹風入戶忽然鏗戛琅玕

聲為我胷中掃煩躁濡毫掃素遊其神乃悟周穆王時
西極之化人但見重巒列嶂盤春轉碧應接來不斷滄
浪之水倒影翻青春風檣沙鳥紛入眼物色明麗不可
陳因思神禹功疏鑿本天意愧我一寸筆浩浩逼茫昧
又疑此水通星河八月秋風揚素波君若乘槎訪牛渚
為言博望成蹉跎嗚呼雲邊縱得支機石成都卜肆今
日無人識

水軒夏日

碧窗晝寂幽意長竹陰滿地琴樽涼輕雷送雨遠不到
雪白水花生晚香

題吳彩鸞書韻圖

仙人固多門積行如累級高卑位既陳所入蓋不一綵
鸞遇文蕭夙運契冥適居然西山下鸞字給朝夕混俗
隱玄秀偶被山靈識蕭爽致福地期延沖化術萬試既
已除天網疎不失豈擬囂塵徒紛亂喪明質正如楊安
君舉手凌白日上道誠不邪匪曰係黃赤所以跨猛虎

示此出世跡歸來乎山中棲神返空碧

寄籌峰林芝巖十首

白盡頭顱老伴疎采芝人去意何如鳳溪春水依前綠
底事年餘始得書

摘得籌峰穀雨茶封題遙寄野人家石泉試火由真味
水到中濡覺浪誇

長記荷花香滿衣二三朋友共吟詩百年聚散渾如夢
舊迹重尋又幾時

甕頭濁酒且醺酣
送謝迎繁事事難
幾樹碧桃開似雪
一生又得一春看

淡煙疎雨滿江城
怕聽村村九扈鳴
傳語林花休落盡
一春好句未曾成

小院回廊日正長
綠陰幽草自生香
春風老矣猶多事
時送飛花出短牆

花落花開一夜風
朝三暮四任狙公
人生未必無閒處
錯恨桃源路不通

市聲不到野人居滿院花陰晝睡餘
偶憶新城羅給事
枉將心力著讒書

青鞋布襪厭趨趨肯向何門學曳裾
錯為黃金換詞賦
一生惆悵馬相如

過雨殘紅轉碧溝夕陽偏戀水邊樓
白頭慣見春來去
縱聽啼鵑不解愁

秋日書情

水軒雨歇天影空我有斗酒誰來同
秋風不知幾時到

羣木盡在蟬聲中

弔石田林隱君墓

百年愁不盡樽酒一登臨
吟事哀猿斷伊人宿草深
少微淪夜壑孤子哭秋陰
歸路西風裏誰能知此心

浮雲

浮雲世事付悠悠局促誰能笑沐猴
終見是非身後定合將名利死前休
化龍梭去驚陶侃挂樹瓢喧厭許由
萬里夕陽天又晚一聲新雁五湖秋

送屠存博之徽州路教官

小時學讀書食寢失朝暝辛勤藉螢雪自謂古人並總
角已識君蘊秀發天性後來骨骼成覺我力不振夫子
經濟才一邑著忠信于今六十載交友久彌敬詞源浩
宏達氣岸激便佞靈椿森蒼標丹桂獨輝映經書選博
士芹泮足沂詠新安山水佳况乃古名郡老別鄉黨情
惻愴髮垂鬢晨征候鳴雞咿喔亦可聽潮平大江豁挂
席風已正明年春草長書來幾時定

信筆成雜言奉簡淨慈如一溪暢文溪梁雲谷三

上人

時與葛川陳渭叟偕為湖山之行

康衢車馬喧塵埃
開門永日徧蒿萊
八月殘暑歸不退
萬里悵望秋風來
青山盤盤入杖屨
為我散盡平生懷
積蘇與礪塊
但覺隘九垓
頽然兩詩翁
班荆坐蒼苔
一盃復一盃
看雲興悠哉
松風洒落如飛雨
棹臂掀髯下山去
古堤屈曲如壞城
往事茫茫不知處
魄驚耳熱未足論
但見愁煙與飛鷺
憂來仰白首
南屏高插天相逢

惠休輩記得三生緣詩篇及茗椀好語相周旋一笑出門情不已握手論文樹陰裏浩歌不用懷古今蟲臂鼠肝聊復爾歸來一路夕陽明千山萬山白雲起

施牧山良會見招不克赴分韻得何字

聞道君家幽隱處名園綠水接官河桃花滿地雨初歇燕子欲雛春幾何千古文章輝麗藻百年人物聚菁莪自慚有句酬清事恨不相從為一過

題秋山圖

江山萬里舊曾遊
閒裏收將水墨秋
記得雙帆投別浦
老來忘却是何州

送友人之東浙

淡交如水古應難
松柏蒼標在歲寒
老去謾傷浮世薄
病來多憶故園安
終求伏道三年艾
喜見桐廬七里灘
心事悠悠轉無語
數聲柔艣別江干

冬日水軒寫望

湖上冬暄鷗不來
山山落日生浮埃
半青半赤烏桕樹

參差遮斷初陽臺

雜詠四首

幽芳泣露質好鳥弄春聲
盡向東風裏悲歡各有情
榮貴如風花安得長美好
馮唐不解事却恨髮白早
老翁似童稚豐歉總不知
曝日聚簷下閒說小年時
涼露老荷葉蓮房亦已空
可憐紅蓼花搖搖受西風

題聯句詩卷後

有序

至元甲午龔聖子鮮于伯機盛元仁訪予與王

子由於紫霞小隱不值聯句而去二十年間相
繼長往惟予與元仁在焉因感存歿書于卷尾
嗚呼古人不復起我亦支離頭白裏憶昔三士相經過
揚激風騷猶在耳鮮于詞翰中原英盛子蚤歲蜚文聲
髯龔詩畫復振古拄杖落落實長庚星雄才盛事不易會
似與百世標儀刑我家兄弟何為者氣與高秋鬪瀟灑
南北東西二十年淪落惟存盛兼馬銜哀不敢話耆舊
掩卷看天淚如寫君不見此道誰復同一曲陽春和應

寡

山居寫興

人事喧喧任奕碁青山數畝是歸期
分將藥草鋤雲種買得松杉趁雨移
老去故人多入夢愁來閒事總成詩
芒鞋布襪身猶健十里沙堤信杖藜

送大名高北山之京

江南山水久淹留又束琴書事遠遊
忍負壯心銷歲月曾將學業動公侯
訴春幽鳥侵煙語迎棹飛花逐水流

莫歎平生少知己故人多在鳳池頭

遊葛嶺有懷

有詩不敢吟吟詩恐未工有酒不敢飲飲酒多昏蒙無
詩無酒情味俗眼前何以慰幽獨幽尋恰得兩三人雙
撓破碎湖光綠鴉回古樹雲不開興闌更問初陽臺只
恐西山賈太傅嗔怪我輩乘船來却憶少陵詩轉好古
人白骨生青苔如何不飲令心哀賈太傅安在哉西風
落日飛黃埃

賦雪吟

屐齒痕深逕路迷
閉門高卧未朝炊
句來天外渾忘冷
竹折巖前竟不知
蕭寺日斜羸馬去
灞橋風急蹇驢遲
謝家兒女空才思
錯認三春柳絮時

冬夜懷古

金華牧羊兒
海上釣鼈客
伊人骨已飛
曠世不可得
求之匪憚遠
道路有通塞
況乃玄冬交
蒼莽山水黑
歸來守蓬蓽
茲事且置側
我生復如何
浩歌山月白

和雲谷粲公見寄詩韻二首

疎簾閒白晝幽事每相親
柳合孤山雨蛙喧兩岸春
舊遊頻入夢落景獨傷神
自愛吾廬好門無車馬塵

志與榮名絕機將鷗鳥親
滄江終負約白髮不多春
吟靜驚山鬼心空守谷神
徑荒猶笋蕨未覺甌生塵

湖山春遊算歸偶作

西月光景微斜簷尚如練
攬衣昧旦起林巒淡方見景
風積霧斂曙牖新禽轉塵動九衢喧
爛爛流目眩遊行

惜歡悰行行信郊甸遺情席細草賞靜引華饌山水信
恬和動息各恩怨雲斷舊時人梁回去年燕姿容一已
晚浩蕩羣芳變豈不懷爾思狗往何由羨

題宿雲圖

白雲起生夕陰重重疊疊寒山深山人住處依林麓清
曉開門雲滿屋老夫已製女蘿衣他日相期伴雲宿

題畫龍門山桑乾嶺圖

昔我經龍門晨發桑乾嶺回盤鬱青冥驅車盡絕頂驛

騎倦行役苦覺道路永引領望吳楚日入衆山暝歸來
愜棲遲山水融心境寸毫寫萬里厯厯事可省理也存
自然疇能搜溟滓

即事

白日坐成晚閉門喧寂分招提緣嶺見杜宇隔湖聞樹
合疑無岬山空欲起雲鄰家晒漁網相見語殷勤

偶成

黼黻青黃入眼迷升沉人事理還齊曾看知北嘗論蟻

不是巴西錯放麀百種時情雲擾擾一場春夢草萋萋
此心肯與南風競已向蒙莊悟木雞

秋日有懷黃瀑翁二首

江關人何遠言忘道屢空和詩多日懶左耳近來聾老
栢繁秋鳥殘雲薄霽虹緬懷遲算作飄泊久成翁

江左文章士風流悵寂寥別離書不至歲月意難消夜
氣勞燈火秋陰拂斗杓白頭仍世故吾道日蕭蕭

福真觀主張貞居落成傑閣喜而賦詩

樓觀澄湖濱稍稍薄林藪羽人何蹁躑所迹蓋不偶貞
居洞元化道勝百邪走一旦從天來經營入無有飛閣
迥招仙虛牖寒垂斗旭日山獻酬翳翳煙侵柳緬懷咸
平士載憶元祐守常恐金門步未遂泉石久羣情慕飲
德伊余就白首即事不能忘結念千載後

嗣師吳真人同李相黑谷觀水遠寄詩篇就韻奉

和

遙瞻紫氣五雲邊立雪曾容馬自然道合迴風聯斗極

心冥秋水入詩篇思萬每動東歸興報國常期大有年
安得仙人食玉法為師鋤月向藍田

再用前韻述懷

春風足馬御河邊舊迹重懷一惘然入覲每趨黃道路
思親曾賦白雲篇差池燕雁三千里奄忽星霜十五年
不信等閒身便老子真谷口未求田

喜徐芝石得子

出處慎所懷山林饒暇日多君宦游意彌年阻良覲風

昔揚清芬皎皎萊妻逸徐卿得佳兒豈負懸矢射含和
玉不如勝貯金百鎰須知濟世才本自書種出于公門
高大茲事由善積積善既有報孝感聽懷橘緬思陶元
亮有子但梨栗失喜成詩章誰能事聲律

秋日竹院

竹院茶煙暝風簷燕壘虛移樽攀野逸打果信鄰居散
木參差落寒花取次疎肯言貧未已爛熳食秋蔬

九日

今日重陽酒西風野老家山雲膠白畫籬菊散黃花醉
倚過眉杖歸隨接翅鴉賦詩酬令節幽思極無涯

送浙東帥幕韓聰甫請老歸汴梁白陽舊業因題

畫卷二首

笑拋公府簿書忙坐石看春兩鬢霜不但昔人還手板
祁奚應喜得賢郎

東風汴水布帆飛舊業歸來計未遲只有白陽山色好
青青渾似別家時

經石田林隱君墓

物色滋華風微和襲春服朋簪盍諧好容與南山麓嗟
彼卧松人營魄抱其獨既秉漢陰志詎起終南祿形影
一淪化疇云繼前躅沈沈正音逝徂輝難久燭塞芳託
所意竟日不盈掬雨餘山更青文脈爛膏沐停雲散馳
颺戢羽念深木返軫靡遑寧展轉達明旭

暇日偕劉悅心仇山村白湛淵諸詩老訪西湖北
山淨空主人玉公清話算歸分韻得來字

松栢山門晝不開秋陰散策此徘徊每懷白傅題詩去
更憶揚雄問字來盡日酒杯隨晚菊千年人事疊蒼苔
池中金鯽疑龍在歸路殘雲帶雨回

題淵明和靖畫像

干祿本為酒身退名益著那因五斗米便作折腰具東
籬菊花開掉頭不肯住如何千載下却被丹青汙
處士徵不起孤山重顏色寸祿既不沾童鶴亦自得野
風吹青春梅花萬古白惟有雲間月可以照心魄

述懷和東淇王高士詩韻二首

一徑蒼苔盡掩扉，緇塵難染薜蘿衣。
欠詩了債人多笑，無酒治聾燕又歸。
細草幽花春醞藉，遠山平野樹因依。
東風不化頭顱雪，牢落江湖萬事違。

竹床支穩晝眠醒，卧讀離騷懶正巾。
壁記西山栽樹日，蝶隨深巷賣花人。
太平簫鼓青春好，零落交朋白社貧。
老眼無端厭塵事，又看桃李一番新。

為一溪如上人賦所收窑爐

春城閒買得埏埴自官窑雅與梅兄對清宜柏子燒心
空凝祕色質古足高標若擬博山並博山應意消

題許道寧畫軸

畫師天與力落筆貴宏壯神巧刻虛無衆色為彫喪嘗
聞許道寧氣逼韋偃行君家見茲圖激我泉石況午光
翻素壁錯愕引遐望冥冥霧靄霽水木散清曠遠近層
岡來造設不可狀初如擁陣馬忽覺轉疊浪秋高岼容
瘦迴風進歸榜山陽最奇秀安得數椽傍終然記華顛

蕭蕭擺塵埃因思造化理詩成一惆悵

和嗣師真人詩韻

物和疵癘已能消鄴邑封侯合是蕭屢著錦衣榮壽標
尚懷樽酒慰全椒秋風江漢歌遺老教雨林泉沐散樵
莫向明時便思隱小山叢桂恐難招

題畫海南入貢天馬圖

傳驛每
餵梁肉

余吾天馬生水中毛如澄墨耳插筒雄姿挺挺浴海氣
一刷萬里追遺風九夷入貢賓來服畫出猶能駭人目

韓子休教喂地黄太僕能令飽梁肉誰憐東郊瘦馬碑
兀如堵牆汗血力盡德不揚尚望明年春草長

送仇伯壽之淳安教諭

蚤年名字動鄉閭細數鄉閭總不如已肅師模先孝悌
更承家學瞻詩書桐江水遠輕帆疾芹泮春香仕路初
好展長材規後學佇看他日際公車

憶昔

憶昔癡小時學語音未似鴉鴉與栗栗啼笑本無自長

大教讀書早覺意不肆只今踰六十僅識數行字肝膽
古今雜好惡出芒刺况乃衣食驅頗受塵埃漬居然無
所成荏苒日月駛不如癡小時孩孩無一事人生非金
石河清復誰俟

和孫康侯見寄韻二首

不羨青山可結茅閒居城市似江郊百年草草人空老
三徑荒荒菊自苞露下天高驚瘦鶴燈昏窟冷笑癡猫
胸中萬事消磨盡只有詩情未易拋

閒栽藥本旋誅茅自分詩飢學孟郊荷葉晚風吹老氣
桂花涼雨拆輕苞癡兒已活能鳴雁黠鼠休欺不捕猫
却笑詞人多漫興一生心力為誰拋

寒食日

密竹疎簾春晝閒疾風甚雨滿江南又逢寒食一百五
不覺行年六十三楚女腰肢從妙舞晉人標格祇清談
不勞燕子終朝語冷煖時情我自諳

話舊偶成

夢裏繁華憶壯時
綺羅歌管競春遲
如今耆舊猶能說
更數十年誰得知

和友人春日詩韻

徐徐杖策到西林
柳合湖煙滿路陰
流水不回雙鬢改
故人何在一鶯吟
弄晴雲影時明晦
過雨山光自淺深
多少春風舊遊事
轉頭陳迹竟難尋

題畫山水

連山轉迴谿衆木
參差列上有不動
雲練練積蒼雪寫

此清曠心浩蕩入寥泝所以冥栖士終身慕高潔

冬日閑思

山水蒼寒雪已晴擁爐兀兀坐忘形西窗日轉梅花影
趁暖閑書相鶴經

三教名流小集葛嶺招賢梵宇奉餞雙徑丈席晦
機翁回江右舊業

人生一世間疾若交行船相語未及聞去迹不可還感
茲聚散理道在心所便我昔隨我翁締此翰墨緣巖巖

慧日峰杖屨時牽聯愴惻念舊雨轉首四十年荆榛塞
古道隱几甘沈綿犧樽被青黃伊誰使之然吹萬本一
竅久矣齊夔蛇茲晨集羣彥餞遠清觴傳北風吹袞袞
別意悽華巔林林山根樹淡淡川上煙扶藜慘不樂目
斷東南天尚想向匡廬為我容三椽萬事擲天外飽聽
松風眠

讀秦紀

六國爭雄事已空南遊勒石紀成功早知三月咸陽火

不買魚燈照夜宮

偶集招賢梵宇奉簡明碧主人併呈演福湛堂講

主

西湖之西北山麓林泉勝處多佛屋招賢一刹丹井西
樓殿崢嶸峙坤軸遠山坡陀儼趨向近山宛轉紛相屬
大開象教走檀施天意弛張無不足羣公一會豈易取
使我平生散煩促忽憶廬山遠法師白社當年締陶陸
明碧主人好事者風流千載今能續我行山下成白頭

岐路崎嶇幾翻覆童童孤山正相對獨鶴不歸煙草綠
只今畫舫日遊行酒肉笙歌自成俗百年萬事焉敢料
吁嗟此輩空碌碌杖藜徒步且歸休他日吟詩寫修竹
南真宜休齋清會竟日偶呈瀑翁主人

萬族何芸芸細大趨所託動靜不一理山林異城郭高
齋表宜休幽素滅丹牖主人有餘靜孤坐守沖漠幸與
君子俱清樽稍酬酢發語各深詣頗覺被禪縛既得寰
中趣稔此方外樂出門松杉暗棹臂寒景落何如杜陵

翁有志但廬霍

送友人之闕

稅使

眼冷江山長歲晏風雪集嚴凝不可當如何遠行役借
問此何之之官非所適一市必立平繩繩謹三尺嘗聞
昔人言厚薄見損益載歌魚麗詩商賈豐貿易堂上坐
慈親閨中處良匹歸來信多娛兒嬌未離膝鬱鬱凌雲
松本自手中植此道詎幽遠君子有終吉

霞外詩集卷七

欽定四庫全書

集部

霞外詩集卷八

十至

詳校官中書臣李彤

侍讀臣孫球覆勘

覆校官中書臣朱鈐

校對官典簿臣劉景岳

謄錄監生臣龔輝遠

欽定四庫全書

霞外詩集卷八

元馬臻撰

春晚偶成

名利塵邊隱几翁
繁華慣識此心空
湖光山色元無恙
世事人情底不同
隔岬蛙喧梅子雨
映堦簷捲棟花風
曹騰睡起吟詩懶
讀得南華一卷終

集句題山村圖一首

先生高興似樵漁
更有何人在此居
茅屋數間窗窈窕

睡時山雨溼圖書

萬疊青山但一川
一村桑柘一村煙
隔林髣髴聞機杼
猶記騎驢掠社錢

嗟餘春

春雨足春水滿
岬花匝匝光風暖
人間杜宇最知機
啼得血流春不管
迷芳著物苦忘歸
直待楊花似雪飛
多少好懷成別恨
餘香沁入野薔薇

舊宮姥

自別長門五十春
白頭往事尚分明
閒邊偶說開爐宴
數得供來泛索名

送范起之赴海鹽州判分韻得一字

喬木留高陰
多君富儒術
分符佐海郡
不減江左逸
瞻茲鄉黨彥
餞祖賓筵秩
此邦足魚鹽
利自氓庶出
願言問凋瘵
惠化均所恤
萬物適生意
茲理在得一
維時青春
深鳥語桑間
日懷君鬱素
抱返軫守蓬
蓽儻寄雲中
書飛鴻及秋
律

幽居遣興

逕穿花竹杖藜輕疊石分流趣漸成卜築每嫌山有姓
避時長羨草無名去官彭澤懷元亮撾鼓漁陽愧正平
不是不才明主棄野心元自懶逢迎

夏日聞鶯

參天夏木午陰清為引新雛斷續鳴不似翠芳園裏聽
惹愁和恨一聲聲

題溪山訪友圖

溪風吹長松石路秋影薄下有尋幽人支筇注林壑良
朋眇何許雜樹森草閣畫師發深機筆底氣參錯我昔
事扁舟頗識山水樂于今日月駛此景亦蕭索愧乏買
山資老負宿昔諾展卷令人嗟高歌激寥廓

贈句曲山李方外高士

有序

雪巘先師嚮與茅阜玉海宗師蔣君以斯道相
與締泉石之盟厥後代代繼承而雲蘿之書往
來無間先師嘗手題絨書云俟玉海蔣宗師直

下高人至授之余亦為之珍襲然莫測其微意
仙山雲深此道絕響幾四十年矣延祐丙辰仲
冬既望貞居張高士以句曲高人李方外道義
根心懷人千里扁舟東下因造吾廬風雪打窗
清話終日偶及宗壇厯代列仙書問方外取而
莊誦惟加敬羨余因矍然而起曰我翁昔日手
緘之書有所待乎遂敬授之方外炷香啟祕乃
數詩藁因見昔人扣擊義意一念萬古列仙有

知當點首于洪濛之表就賦律詩一首餞行

遼海千年鶴華陽萬古春書題誠有待歲晚得斯人五
世金蘭契羣公翰墨新舊山松石在為我話前因

和王東淇病中見寄詩韻

裘馬遺高志山林喜若人誼深元有道吟苦不無神躑
躑猶芳意鸝鷀只算春近聞親藥裹疎豁任吾真

集句題張玉田畫水仙

賞月吟風不要論曳裾何處覓王門誰人得似張公子

粉蝶如知合斷魂

挽雪房孫高士二首

飛書昔日下彤庭自帶孤琴赴鶴翎
萬里冰霜頭盡白
一生湖海眼誰青
纔尋舊業盟松菊
豈料斯文失典刑
弔罷出門還慟哭
看雲不見少微星

帷月簪星七十翁
結交真似古人風
曳裾每憶升平舊
對酒常疑夢寐同
字好謾堪傳法帖
病危猶得寄詩筒
承家令子收文藁
終古乾坤有至公

為石室瑛上人題松陵圖

左右江湖送客船
分明往事十年前
三高祠下秋風起
貌得詩愁畫裏傳

讀史偶作

閒讀遺編入夜深
是非人事一傷心
五絃已矣廣陵散
三士嗟來梁父吟
酒味豈應移厚薄
書郵還得信浮沉
平生羨殺青山色
不逐浮雲變古今

冬意

赤葉楓林冬意深，葛公嶺下晚沉沉。
冰霜不改蒼松操，日月長懸古木心。
桑落酒醒添感慨，初陽臺近憶登臨。
疎慵無補升平世，自點寒燈續夜吟。

挽瀑翁黃尊師

窮陰逼算景始候，新陽舒開歲倏人。
日復值寒雨餘駕，言接親朋步履還。
踟躕晨興驚扣門，乃云哲人徂伊余。
篤雅好心邇跡自疎，匪構囂塵談所詣。
皆詩書時哉重三歎，鑒枘方圓殊一朝。
忽長逝吾道將焉如，緬懷宜休。

齋觴詠存怡愉揆景一今古豈不念厥初酸風切人腸
有淚如楊朱廬山舊時雲魂歸今有無悠悠江中水青
青水中蒲此別異生死何言不歎歔蒼天乎蒼天後來
誰起予

挽會稽喻千巖

安道亡來隔幾塵羨君終作隱淪身故園松菊燈前夢
白髮衣冠席上珍兩地月明寒浪積千巖木落暮愁新
誰憐矍鑠西湖叟歲晚江空弔遠人

暝色

暝色下千里倚闌勞此心歸鴉數不盡殘日看來沉岼
靜依漁火村寒急夜砧年光與流水汨汨向人深

開元宮鶴雛

玄圃春深瑞氣凝松風養得羽毛成開籠已覺逢人避
趁食還能向母鳴待舉霜翎天路直偶遺瓊藥露華清
為言他日隨泥詔緱嶺飛仙在玉京

贈山友

諸峰生算色燈火靜相依老屋藤蘿滿詩家眷屬稀風
香傳藥竈露冷葺荷衣明日城中去思君詠式微

讀天台洪耕道詩集二首

君詩如古人格律迥孤清極力不易到艱難中混成秋
聲閒過水月色靜臨城夢想天台路何因慰此情

詩名知己久老大不相逢雅道無人識至公終見容江
深涵萬象雲盡出孤峰吟斷秋燈暗寒城聞曙鐘

和仇村翁九日招飲詩韻

每愛淵明詩珠璣光可摘君家枉新語粲粲壓元白有
若探滄海驪龍此窟宅今歲菊花開不受風雨迫念茲
展良會觴詠忘主客百年幾何時況復難滿百緬想龍
山人西風墮巾幘

贈節婦

一從慟哭失良人便撫孤兒誓此身不為困窮移素節
自勤機杼給青春柏舟義大詩仍古竹帛名香史又新
今日賢郎何以報好將忠孝答君親

和灤都秋日詩韻

古道經年雪萬秋
萬里風遊鯢隨巨海
斥鷃樂飛蓬
天地皇居壯華夷
聖化同吾宗
貴清靜教在不言中

廣微天師墨竹

天人體道天機深
書畫時傳道之迹
葛陂龍去秋荒荒
留得煙梢凝寒碧

延祐丁巳夏偶成七言二韻詩十首奉寄雲門斷
江長老聊述近況就敘別懷

雲門寺裏斷江老向來遠寄十首詩我欲報之無好句
到今夢想成差池

憶昨讀詩五六輩小集淨慈西隱樓鶯聲終日遶喬木
南屏正在屋山頭

晦機八十似古佛胸中盎盎浮陽春仰山極力負之去
今也湖上無其人

我家瀑翁廬山秀文行綽綽堪吾宗一住南真向十載
不意歲晚凋孤松

錢唐耆舊不可數譬彼長風吹斷雲賴有白頭仇博士
斯文一脈張吾軍

匪石司業鄉黨敬有似荆玉楊文章新除待制翰林院
此別動是三年強

開元宮中鄧蓀壁身居職守心虛無近來世事不入意
要鑿混沌求玄珠

玄洲高士張伯熙妙年藻思長於詩孤清不受俗物累
掉臂看雲也大奇

幽居背郭人事少
況乃竹戶濱湖開
相望淨慈隔一水
蒙堂高僧時往來

斷江放下鈍斧柄
杯視江湖雙眼空
如今宴坐白雲裏
千巖萬壑生秋風

廣微天師大真人仙遊詩

憶侍飛轅謁紫宸
教宏正一體慈仁
真仙品極陶冠褐
印劍光寒懾鬼神
契重玄丹亦化手
書遺訓墨猶新
又騎箕尾何方去
龍虎山凝萬古春

湖樓夜坐

孤樓侵樹小老雁入雲迷月暗水光白夜深鄰語低鐘聲傳下竺梅信失西溪偶憶曾遊寺塵昏壁上題

除夜

憶昔元正少壯日斑衣鼓舞樂時和逢迎衮衮歲月老
今古悠悠興廢多舊俗猶存柏葉酒新詞還聽竹枝歌
強裁詩句供春帖勝裏金花奈爾何

挽瑞石許山長

幾回言別竟差池聞訃令人信又疑老大猶為曳裾客
孤高渾似出家兒篇章舊藁刪纔定鄉里同年說更悲
一樹紫荊花半落可堪吟斷鵲鴿詩

山寺

細泉分石路寺古占山均暗壁蒙蟲網枯松集鷺巢
高鈴語切峰遠燒痕交安得遺塵事雲邊小結茅

村中社日即事

春酒醺酣割肉歸數家茅屋住村西
恢諧謾想東方朔

牧養誰同百里奚廟古神旗標麥隴風輕疊鼓過桃蹊
升平景物詩難寫又聽桑間戴勝啼

集句和陳渭叟見寄詩韻五首

幾處酒旗山影下為君沽酒若為情平生不解藏人善
一夜船中語到明

寒食離家麥熟還不應空老道途間會須伐竹開荒徑
剩著溪南幾尺山

池邊月影間婆婆卧聽行雲一曲歌閒憶昔年為客處

囊中無物只詩多

湖水入籬山遶舍紅蕖全謝鏡心香當年不得盡一醉
沉李浮瓜冰雪涼

撼起流鶯晚吹寒懶眠沙草愛風湍身閒我欲頻來此
只有東溪把釣竿

浙江晚眺

西興渡口江風起處處青山間白雲一幅天然古圖畫
千金不羨李將軍

弔月汀屠教授

千山萬水新安郡頭白之官已足悲
一夜謝池迷草夢
三年魯頽失瓜期讀書尚憶同窗日
忍淚何堪會葬時
留得乾坤清氣在
遶墳梅樹夜吟詩

送友人之東浙

物換驚殊俗鶯啼憶舊城
春江常不定風絮故能輕
樽蟻延離席檣烏送別情
所嗟俱素髮得得向人明

田父詞二首

龍鍾田父住深村桑柘岡頭石路分猶領兒孫到城市
向人聽讀勸農文

處處叢祠鼓篴喧已占蠶麥十分添醉騎牛背歸來晚
亂把山花插帽簷

挽南谷杜真人

仙源奕葉草樓孫道俗人人仰達尊兩地祠真輪奐美
一生接物語言溫註經洞析玄元旨錫號榮霑雨露恩
多少鄉鄰懷舊德紫雲關外望天根

春日山行即事二首

弄晴小雨潤春泥
野店青帘竹逕西
記得去年同客醉
花邊停酒聽黃鸝

行春足繭倦躋攀
坐石眠雲日暮還
又是一年寒食節
幾家兒女哭青山

春日偶成六言五首

半窗落月人老一
夜東風燕來迢遞
春歸幾度依稀夢
憶三臺

絕憐姑惡啼曉不分桃花笑春萬事轉頭陳迹青山於
我相親

兩袖水風春冷一抹山煙晚晴小檻倒披花影歸船遠
送歌聲

燕拂花陰繡轂人指簫聲畫樓楊柳六橋舊夢夕陽一
段新愁

柳傍風前學舞鶯在山邊怨春桃李自矜好景是非不
屬閒人

題畫山水

卓犖老氣吹蒼寒太古屹立天地間恰似秋風萬里至
白雲飛動終南山

賦得春潮送錢塘汪復心主簿

滄江氣涵虛二月風濤作帶雨捲煙華連檣動林薄既
復舊痕高還向汀沙落錢塘東南盛茲邑半山郭多君
時濯纓書暇問民瘼寓茲消長理聚散遣憂樂枝流無
縱鱗所適惟大壑欲寄悠悠思川平已如昨

春日閑居雜興十首

宿雨兼風釀麥秋，餘寒欲斷自遲留。
杜鵑啼得百花盡，却向綠陰深處愁。

野草幽花似有期，蜜蜂蝴蝶滿疎籬。
自鑽新火過寒食，續得去年春算詩。

亂蛙聲歇四更多，山寺燈昏窳堵波。
枕上句成還睡熟，再尋幽夢入雲蘿。

芳園雨歇燕泥新，草滿中庭不似貧。
書罷倚闌心緒懶。

敲門多是詠詩人

故人去後詩筒少春雨晴來花事空

缺

時不待

謾教鶯燕語東風

茶香庭院一枰棋柳影侵堦日自移因見刺桐花滿樹
等閒憶得故園時

綠波如染帶花流陣陣魚苗貼岸遊日暮畫船歌舞歇
春聲散入錦纏頭

花底飛觴酒浪翻纔迎春至又春殘日斜客散爐煙盡

自洗甕瓶插牡丹

門掩春風柳數株
淡黃蝴蝶遶畦蔬
鄰家稚子渾無事
鬪草歸來學釣魚

白頭無意作生涯
旋典琴書了歲華
有底閒愁消不盡
曉來微雨溼楊花

古碌碌詞

碌碌復碌碌
我所思兮在空谷
空谷幽蘭獨自芳
欲往從之失南北
濁溼清渭不用分
試聽烏啼丈人屋
子雲枉著

太玄經千載寥寥有誰讀何如北窗一覺睡況乃百年
如轉燭不然留取三百青錢換美酒爛醉春風歌碌碌

春江言別口占

送子清江臯江煙黯行路鳥啼山隱春潮長人爭渡世
上無別離何由髮垂素

孟夏

孟夏氣清曠春然忻北林餘芳散縷縷佳木藹沈沈臨
流敞南扉永日喧新禽塵務豈云料茲馬洒煩襟

偶成小軸山水寄仰山長老熙晦翁

南山每獨往問認西隱樓清陰藹喬木天風忽涼秋歸
舟沂平湖遙見仰山月月色如德人萬古光不滅素練
不盈尺寫此千里心欲知相憶不明月是知音

嚴陵釣臺

自整蒲輪出帝鄉客星名字也非常輕將好爵千鍾貴
博得鱸魚二尺強已訝錦衣榮故里更殊仙仗謁南陽
富春山下雙臺迥青史芳傳萬古香

賦得廬山洗墨池送陳成善記室還山

疏鑿念前修一泓隨矩折千載硯雲香幾度匡山月慎
勿濯素絲素絲光易滅送子惜離悰秋風動華髮

題陳所翁畫墨色卧龍二首

焦霧流雲意匠勞天風鱗甲動霜毫莫教流落人間世
怕有當年葉子高

曾出泰山飲渭川怒風翻浪自高眠如今四海均霖雨
不用拏雲上九天

自營

自營荒圃翦蒿萊
乞得鄰家菊本栽
籬落螳螂搖露草
堦除蟋蟀鬪秋苔
靜拈古帖臨池寫
閒把清樽向竹開
鑑物近來知止水
莫因兀者笑王駘

送淨慈瑛照二上人往吳興讀藏經

萬法本歸一一從
何處得浮漚
幻大海起滅波浪黑
燦燦摩尼珠可以照羣惑
上人俱妙年
穎悟發英特
方外信天遊
匪為名言索
悠悠雪川水
一葦未嘗隔
霜風切

玄冬別我振飛策讀盡大藏教慎勿留一畫魚兔既入
手筌蹄皆長物心天空蕩蕩觸處極樂國歸來面壁坐
不讓過去佛相逢但一笑笑指山月白

夢黃瀑翁

忽忽逢迎事總虛夢回城柝四更初宜休齋裏窗前月
曾照當年夜讀書

贈筆生二首

井梧分影半遮牆細細風生曉色涼閒寫新詩試新筆

桂花時復送天香

中山老兔觸且蹄
采得霜毫健復奇
當日若逢回處士
題詩應不用榴皮

題李安忠畫雪岨寒鴉圖

北風萬里吹石裂
古樹槎牙推朽鐵
羣鳥啞啞如苦飢
倦飛還向空林歇
孤村荒寒得食遠
日暮沙邊啄殘雪
回情訴意各有態
羨殺畫師心更切
我嘗記得天隨詩
至今讀之長激越
婦女衣襟便佞舌
始得金籠日提挈

老鳥老鳥爾身毛羽黑離離
況復人間厭爾啼何不飛
鳴丈人屋丈人屋頭春柳綠

述懷

清風窗戶竹蕭疎几席無塵足
自娛囊罄未應慚北里
金銷元不為西湖大荒今古漚
生水萬化枯榮戶轉樞
蠻觸到頭成底事輸他象罔得玄珠

冬日村中即事

暖釀霜晴打稻聲興來閒策短筇吟
寒鴉流水岸容靜

矮屋疎籬村意深
歲稔雞豚喧野市
寺昏鐘磬出疎林
路傍老叟逢人喜
似得熙熙太古心

山中雲

山中至樂塵中稀
洪濛之氣凝清暉
如何白雲不肯住
盡日隨風天上飛
須臾影滅風難追
望斷孤鶴歸無期
無心有心吾不知
負却一段山中奇

題畫雜詩十九首

輕紅淺碧欄斑溼
複水重山共春色
憑誰喚起鄭廣文

白髮相看話胸臆

山吐白雲雲吐山屋木淡靜天機閑
洪荒古意畫圖在
安得著我茅三間

愛畫一生頭漫白人間誰復問
營邱高風急雨捲秋氣
浩浩空光隨筆流

四山莽蒼迷行路曉寒壓折槎
牙樹竹屋柴門晝不開
疑是袁安讀書處

岸水依痕釣艇閑炊煙幾處出蘆灣
西窗正是斜陽好

一帶泥金抹遠山

雨餘山色天然好洗盡鉛華任春老
羨爾營丘水墨仙
政須不用閑花草

江上白雲連岼起路邊山杏出籬開
片帆知傍誰家宿
春色還從萬里來

山水蒼寒起煙霧客船繫在沙邊樹
恰如昔日壯遊時
揚子江頭卸帆處

飄風不動江天豁何處歸舟犯空闊
大哉宇宙春無私

小草幽花岸邊活

衆色一掃羣峰寒春凝寶汞石齒乾山腰殿閣不可辨
髣髴太古玄都壇

月華如水天如空蒼煙遠樹涵秋容筆頭墨盡意不盡
參錯雲山三四重

數點寒鴉水遶村幾家茅屋掩柴門白頭溪叟歸來晚
自把漁舟繫柳根

曉晴江浦生秋水林麓青黃差可喜詩情畫意欲相高

一抹沙堤三十里

輕雲漠漠天影空江村雨過生微風似嫌野外春淡薄
故點桃花深淺紅

北風眼冷搖林莽興盡歸來數聲鶯無人領此一段奇
却向青樓醉歌舞

白雲遮斷重重樹路轉峰回入雲去多應只是鹿門山
不見龐公住何處

春陰淡蕩歸帆急疊嶂層巒凝空碧知是夜來風雨深

村外野橋低二尺

平生每厭囂塵喧
羨爾扁舟獨垂釣
森森衆木水風涼
應有新蟬慰斜照

採菱渡頭秋日晚
孤樓隔岸知誰家
參差遠樹雜雲氣
滅沒漁舟侵浪花

題青松白鶴圖二首

道人手中五色筆
青山拂起秋雲飛
秋雲飛去青山在
白鶴一雙來翠微

萬里天風下玉京
瑤池宴罷碧桃春
歸來城郭還依舊
只有青松是故人

送江西熊履善茂才之金陵五首

洪崖嶺上白雲飛
底事君歸未有期
慈母手中針線迹
征衫不似出門時

君向秦淮我在吳
柴門白髮老西湖
書來莫附洪喬便
只道經年一字無

寒煙蔓草正淒迷
虎踞龍蟠舊入詩
若問六朝舊日事

石頭城下月明知

武林新酒綠於染不及熊郎別意濃正是江南佳麗地
到時春滿積金峰

寥寥古道轉堪憐懶讀殘書入晝眠眼底交朋星散盡
一秋幾作送行篇

霞外詩集卷八

欽定四庫全書

霞外詩集卷九

元 馬臻 撰

西湖春日壯遊即事

延祐戊午春偶以釣槎之暇因念西湖春日壯
遊尚歷歷然眉睫間光陰幾何余矍鑠矣遂成
七言二韻詩三十首以寫幽懷後我之生或不
我信儻遺老覽之則將同一興感焉

遶湖無處避芳塵疊鼓紅旗彩鷁新
冉冉春雲來不斷

涌金門外踏青人

霍山廟食慶流虹
民物謳歌樂歲豐
七寶社回呈了鳥
年年歸路雨和風

南屏山色染春煙
路接高峰社鼓喧
第一橋邊春更好
御舟閒在翠芳園

問誰偏解占風光
飛蓋金鞍白面郎
山北山南遊欲遍
畫船教艤集賢堂

瑞煙祠宇隱垂楊
士女穿花語笑香
三十九賢森翠碣

虛舟亭上借傳觴

鏤玉雕瓊簇鬧竿
珠花翠葉縷金籃
東家年少貪游冶
正值明朝三月三

流蘇兩兩挂船頭
繡額珠簾不上鉤
金縷緩歌家宴靜
午前先入裏湖遊

紫染春羅袖
裁伶人楚楚
自訴諧部頭
教奏金娥曲
盡向船棚一字排

笙歌簫鼓沸春濤
耳目難禁應接勞
院落鞦韆誰氏女

綵繩擲起過牆高

綺陌遊人隘暖煙去年時節賣餚天
隣家兒女歸來晚
買得塘魚折柳穿

萬柳搖金接畫橋一清堂外景偏饒
文章太守開華宴
預報龍舟奪錦標

歌妓娉婷畫不成去年初籍教坊名
新腔翻得梨園譜
喜入王孫喝采聲

園丁花木巧栴栳萬紫千紅簇綺筵
折得青梅小如豆

獻來還索賞金錢

揉藍染水翠浮山堤上亭臺錦繡間
花柳禁人攀折去
要留春色大家看

進餘薇露與流香散落人間任品嘗
處處旗亭招客醉
大書不是趕春場

珍禽翠羽養雕籠列向船頭盡不同
憐殺錦鸚偏解語
喚人提挈避東風

潏灩春波鏡面平扁舟賣物往來輕
翩翩鷗鷺翻晴雪

慣聽笙歌也不驚

豪家遊賞占頭船趁得風輕放紙鳶手拍絲綸爭上下

一時回首看青天

乍暖春衫薄似紗少年三五自譔譔醉眠芳草醒來晚
尚覓魚羹向酒家

嬌民技藝也天生關巧搜奇事事能稚子土宜偏劇戲
浪兒黃累十三層

一路亭臺間酒家漸看楊柳綠藏鴉太平官府無民訟

補種沿堤四季花

畫船過午入西林人擁孤山陌上塵曾被弁陽模寫盡
晚來閒却半湖春

要囑園丁取折枝紅桃白李紫薇石函橋畔人煙晚
挑得春光一擔歸

遙看暝色下漁汀金鴨香消酒半醒倒轉船頭元有意
檻邊人報放流星

天街夜市已喧闐半掩城門玉漏傳籠燭絳紗爭道入

湖心猶有未歸船

鞦韆罷蹴綵繩低林館鶯聲白日遲處處荼蘼開似雪
不甘便作送春詩

桃杏移春點碧苔柳綿飛盡小池臺憑君莫信啼鵲語
更有花王最後開

送得春歸夏又初名園不放玳筵虛只知富足家家事
肯為兒孫教讀書

誰家乳燕掠船過小小荷錢出水多梅雨乍晴人病酒

綠陰天氣正清和

慣見升平春復秋
分明往事昔年遊
西林橋外青山色
幾度夕陽人白頭

短髮

短髮今餘幾
浮生一笑嗤
置身名教在
造物小兒為
司馬猶三好
梁鴻謾五噫
黃金留買賦
不必鑄鍾期

秋深村意

過雨山光入眼明
菊花店舍酒旗新
村墟近市魚蝦聚

禾黍登場鳥雀馴水驛幾株紅葉樹溪橋數點白衣人
太平風景真圖畫長愧詩情寫不真

歲暮懷友二首

積靄迷山意殘冬逼鬢華
岼梅行的皦野竹任交加
興盡山陰棹心冥海上查
故人歸未得雨雪正天涯
少壯時難再沉憂酒被欺
江山容老大歲月信差池
人事忙中盡天機靜裏知
存存生意在翻羨石腸兒

幽居

一徑荒涼長碧苔竹門斜對遠山開自操清白傳家譜
不受青黃致木災穴鼠苦銜詩藁去溪螯喜薦酒尊來
東籬滿地金錢菊多謝西風為剪裁

安分二首

分明物物理非殊不足無心望有餘往事百年槐國夢
清風千古漆園書畫龍已愧迷真偽抱甕還憐較疾徐
滿屋秋聲堪隱几莫驚鐘鼓饗鷄鵒

一身慵懶老來添倦汲溪流灌小園
昭諫謾愁花解語

天隨曾聽鳴能言看雲倚杖知閒極背部移家為市喧
珍重鷓鴣心自得休因腐鼠嚇雛鴛

贈漁者

湖山青湖水碧白頭漁叟扁舟急山青水碧竟不知賣
得魚蝦將米歸沙邊矮屋兒啼飢

院落

院落閑深靜逍遙情叵同鳥鳴煙淡池花晚春冥濛遣
理思慮外養真山水中唯當坐永日領此竹窗風

暇日偶寫熙晦翁仇山村俾予陋貌髣髴三老坐
松石間傳于短縑長不盈尺就成七言詩一首

奉寄仰山丈席

晦機老子八十餘青瞳炯炯霜眉鬚風幡自動心自如
胸中錯落盤經書別時記得吟詩送世事區區等春夢
漢無綺皓商山輕越有鷗夷五湖重神遊夜遶梅花洲
覺來衣袂清香留賴有白頭仇博士與我聲氣同相求
招邀三老成圖畫從渠讚嘆從渠罵不然只作虎溪看

他日叢林作佳話

悲哉行

悲哉白壁埋黃壤富貴熏天一撫掌當年吐氣結成雲
如今卧聽松風響

蕭翼蘭亭卷

治國不求難得貨使民為盜過繇誰松風已閉昭陵土
誰料人間出有時

為玉岑入侍者賦定巖

凝結先天混沌胚亭亭八表任風吹要知心外無巖處
不在蒲團宴坐時

送僧入定巖回青鎮密印舊業二首

玉岑聽徹講時鐘夏滿思歸別意濃想得經房秋色裏
薜蘿窗外一重重

海珠僧寶絕塵緣正印全提契密傳聞道昭明讀書處
水光山色似當年

寄題淳安方山長觀雲齋

晝長倚檻書眼開一片兩片山中來無心不肯作霖雨
轉覺清風生釣臺

寄題瞿叟徐學正小蘧廬

嚴陵灘前山水綠萬古乾坤一茅屋床頭書滿僅容膝
晚來無處招雲宿主人養浩心自足繇義居仁慎其獨
誰言此室大於斗明月能量千萬斛却喜門無車馬喧
秋聲不離窗前竹

酬知已

自笑謀生拙算年翻百憂古心終不變詩癖死纔休白
髮時消息黃金身贅疣感恩非一飯毫髮未能酬

挽悅心劉州判二首

故家喬木暝煙愁文物衣冠不易求授業教尊侯泮日
分符老寄浙江州每推詞賦多新語長對湖山憶壯遊
杜宇數聲春夢斷可憐心事負盟鷗

相看白髮重關情誰謂先生便隔生池草入吟驚昨夢
山花對酌誤春行圖書滿架人何在弓冶承家道自亨

五十年來交友意
曉風和淚送銘旌

贈皇甫秀士

止水鑒及微
圓月光始揭
一方可中庭
物象逼騷屑
桐江皇甫氏
壯歲盛學業
其曹唐詩流
未下白傳列
源垂百世後
疊疊襲芳烈
貴賤取諸身
索理詣超越
麻衣希夷輩
聞見亦欣悅
勇退難其人
此語慎輕說

聞仰山丈席熙晦機訃音

前年哭松瀑
我家顏色薄
今年哭晦機
禪林慧日落
大

道甚平夷夫子猶木鐸攢眉聞訃音形聲想如昨驚怪
欲狂叫淚下還復閣萬古一死生安用鐵鑄錯縮頸慎
勿出門外北風惡

簡王仲通明府

曾聞宰邑江陵府汎愛民間說到今馴雉自諳絃誦樂
飯牛不入利名心青春白日庭堦靜綠幙黃簾雨露深
未必伯牙山水意只逢鍾子是知音

題常牧溪山水卷

高林衆木秀延眺極秋閣川明宿霧斂巖迴飛淙落弱
齡見手畫此士久冥漠萬里岷峨風空待遼天鶴

除夜二首

此夕逢除夕春隨綵勝新盤飧寧媚竈斗酒更招鄰柏
葉香仍綠燈花笑不嗔定知能報喜未料白頭人

竹爆催年換椒香入頌新梅花休笑客燈火故親人詩
憶周南化時驚甲子頻老夫無節序盡日懶冠巾

雪霽

歲律春仍近寒威老不勝鵲巢擎積雪魚穴凝堅冰賒
酒鄰多厭尋詩檻獨凭逋仙在何處感激涕沾膺

題錢舜舉畫竹萌茄蔬圖

我茄戀我遣不去飲水曲肱有真意達官日日飽太官
笑我出言蔬筍氣錢公寫生高吳興筆力超詣森有神
視此慎勿貴八珍重茵列鼎聞之嗔所謂紫駝峰猩猩
唇夢想不到林下人但願一飽安餘齡區區口體之累
何足云

淨慈西隱祭晦機和尚

四時有代謝陰陽隨慘舒萬物具一氣運此環中樞
晦機宗門老貌古山澤曜我了三生緣識自壯歲初融理
貫百氏經書何不劬每挹瀟灑志冥心失憂娛卓錫振
叢林挺秀人天模無有入無間百體誰親疎區區過耳
事臨風一長吁尚想留別時踏曉尋吾廬數語發肝肺
悠悠戒前途徑仰本一山片雲隔錢湖秋風兩三至庶
得數寄書正為梅花洲足以寧君軀胡為擺世故遺此

載神車造化未形我獲落無所居我形忽已化還與造化俱范張未達道錯認生死殊但念平生意復惜流年徂惟予困白首寒巖一枯株既無枝葉累不受春吹噓感愴謁西隱南屏峙層虛合爪一瓣香隨分營伊蒲冬交雨雪集魂兮歸來乎松菊固無恙入眼皆真如詩成流中腸覩縷不暇拘奠罷出門去野日低寒蕪悲風為我起躊躇重躊躇

讀唐僧詩

高僧吟興苦吹萬各秋聲著物鬼難測為容人盡驚力
回千古意氣逼五言城輸與無心者輕輕道得成

題唐十八學士圖

唐家天子登黃屋大業隆興調玉燭當年十八登瀛仙
弘文日侍分三六兩京初定四海清君聖臣賢古難續
立本圖真亮為讚遂令書府藏諸櫝後有龍眠傳此本
禮樂衣冠激流俗自從淪落向人間畫手紛紛互翻覆
千年事去君莫問留得青編遣人讀蕭蕭馬耳射東風

長安道上春山綠

為僧缺上人賦鶴山二首

緱嶺春風白日閒
上人愛鶴自名山
別來莫似遼東客
一去千年始一還

記得嵩陽松樹高
採花不覺誤翻巢
天風萬里飛何處
老向山中自結茅

謾成四十二首

林間把酒山雞舞
竹外支筇野鶴隨
醉卧落花春不管

醒來惟有白雲知

松風滿屋散輕濤老圃無心事
桔槔曝背簷前趁斜日
怒爭梨栗笑兒曹

徑曲交加鎖竹陰不教寵辱到林扃
心閒莫道渾無事
粉落松花汙鶴翎

參天楊柳手親栽一院西風戶牖開
落日尚餘三四尺
山平水遠看秋來

區區得失付酣歌誰信簞瓢得意多
荒逕久無桃李樹

不知春事已如何

遶籬綠橘間黃橙籬外青山取次橫
一陣晚風寒霧斂堦前待得月明生

九日籬根菊未黃無詩無酒惱秋光
偶思巢燕歸飛盡自理枯蒲葺草堂

溪蟹初肥濁酒香村南村北稻登場
白頭羨殺田翁樂醉向茅簷卧夕陽

小春天氣未生寒綴樹朱櫟正入看
昨夜海棠開數朶

一雙蝴蝶上闌干

新霜尚薄樹聲乾
寒水無痕倒浸山
知是釣船歸較晚
鷓鴣嚶嚶起蘆灣

飽霜紫芋細凝酥
旋撥寒灰出地爐
慚愧隣家新酒熟
客來沽得滿葫蘆

野花芳草三春夢
楚水吳山兩地愁
心緒晚來禁不得
半身斜日倚江樓

曾向山中靜結廬
雲邊煮藥自樵蘇
不知白鶴巢松樹

占得門前第幾株

世態爭趨向背機
眼看朱碧漸成非
山桃野杏春猶淺
早有青蟲化蝶飛

蕭蕭野老髮垂肩
家住湖西杜若煙
載得茭根入城賣
西風落日滿歸船

草木淒涼露未晞
秋蟲琴瑟漸聲低
竹窗夢覺湖光白
月在鄰家釣艇西

風琴流響韻虛堂
湘簟歌眠水一方
靜裏數聲棋剝琢

乳鶯深向綠陰藏

眼底紛紛五色迷
楚人元不重山雞
老夫驚覺槐陰夢
悟得南華物理齊

槐柳交陰日正長
荷花荷葉滿回塘
人間未必渾無暑
心地清涼暑自忘

老圃秋光亦可佳
淡煙涼月自生涯
儘容詩酒酬清事
丹桂纔開第二花

珠絡楂橙滿閣垂
欣欣節物暖爐時
膽瓶小巧偏堪愛

插得檀梅一兩枝

長憶成人總角年
學吟終夜不成眠
精神消盡今頭白
祇得詩名不用錢

夜雨膏濃曉又晴
熙熙景物象升平
啼鶯只在花開處
誰識桑中布穀情

槐陰滿院喧巢鴉
蜜房香老蜂趁衙
鄰家艇子釣魚去
水光搖動金蓮花

移榻松陰避月明
天河萬里度流星
仙遊夢覺蒼華冷

猶聽鶴聲來杳冥

西風吹雨十分涼
店舍新簫拍甕香
淨洗瓦盆刪菊本

老夫作意做重陽

老我何堪樂自全
不將造物強枯椽
貪眠又過希夷子

一夢人間七十年

枯蒲風急駭棲禽
紙帳燈昏坐擁衾
門外霜華如練白

不知何處尚鳴砧

飯罷迴廊轉數遭
不知積雪重林梢
自憐迂僻人多笑

洗竹交加助鶴巢

勝景園西石路平
瘦筇扶我過南屏
希夷名在菴何在
應是先生睡不醒

北風小雨戒新寒
隔水楓林葉已丹
莫道閑門知己少
白鷗飛去又飛還

隱隱寒燈竹院深
暗風吹雪打窗聲
利名不入蒲團夢
一衲蒙頭坐到明

斜陽日日過山坳
鐘磬相聞隔水敲
生事一盂餽粥外

靜看林下鵲爭巢

燕山楚水曾為客
慣聽霜砧搗月明
不似新愁怕新鴈
秋風吹落兩三聲

晴日穿花暖似烘
風簷微動玉丁東
山童睡起心無事
斫得筇枝補鶴籠

岸柳禁風葉漸疎
乍涼還試夾衣初
雨添秋水入籬落
閑看鷺鷥行捕魚

酒能醉客心難醉
詩解窮人思不窮
千古湖山百年事

倚闌分付落花風

芙蓉露溼天宇清
星河淡淡蟾蜍明
西村知有夜船過
撩亂一羣鸛鴒鳴

雲歸雨歇湖水平
五色蟬螭山邊明
唱歌舟子採菱去
十里柳堤蟬亂鳴

煙水微茫沒釣磯
物情人事兩依依
楊花自逐東風去
空見漁舟日暮歸

送客河橋愴別懷
露花煙草見船開
傷心不及梁間燕

又逐春風冒雨來

西鄰張樂通宵飲
野老耽吟盡日詩
總在天機流轉裏
可憐樂處不相知

村中即事

溪流涵決山回紫
村歌牧笛亦可聽
岼靜幾枝白菡萏
雨餘無數紅蜻蜓
遠林風入自成韻
野廟人來時乞靈
詩家縛律寫不盡
天與萬古開丹青

挽周草庭母氏

幾生種德壽期頤早適儒門備母儀
追遠不求黃面老
送終喜見白頭兒
堂萱杳杳承顏日
風木蕭蕭陟屺時
莫挽靈輶重惆悵
已傳書種到孫枝

碧山書堂

巉巖潤聚洪濛色
屹立長空湖海窄
翠積松杉重不開
昔日曾栖釣鼇客
釣鼇客去凌蒼蒼
今人此地營書堂
桃花流水杳然意
為君千載揚芬芳

中秋夜偶成

紫梨紅棗關芳鮮節物關情亦可憐
去住未成為客計
陰晴不定看潮天
百年林下人空老
幾番天邊月自圓
夜倚高樓逐清景
怕他鶴過有神仙

綠陰

樹色雨餘多芳菲
一夢過參天
障午日接葉覆官河
晝寂碧雲合
風薰翠幄羅
倦遊思避影
况復正清和

題虎溪三笑圖

無生一曲無人和
石池水滿蓮花大
揚眉瞬目喜津津

不覺回頭虎溪過咄哉三士皆人豪
醉醒不理柴桑陶
傍人若問笑何事向渠指點廬山高

經故人舊居

物換人非夢一場世情消盡也思量
春風門巷經行處
欲倩啼鶯說斷腸

為吉上人賦半雲

山僧結屋青山麓只有巾瓶伴幽獨
分取半間招白雲
日暮莫教巖際宿

挽松江姚守二首

阜蓋朱穡事宦游歸來聲價滿杭州民康物阜三年積
子貴孫榮幾世修紫禁春濃期入覲玉棺天降已難留
吳松父老懷遺德掩面西風哭故侯

占得人間樂事全一門餘慶盡才賢蔭依華胄朝廷重
寵錫金章父子聯輪奐落成將佚老瑟琴中斷竟空傳
佳城已卜佳山水鬱鬱南屏入翠煙

為會上人賦百川

百川日東流，袞袞趨大海。異派同一源，萬古波不改。冷風則帖妥，飄風則滂湃。善下無不容，乃得成其大。上人強名號，此意亦有在。彼來既不息，此受非所待。安得木玄虛，作賦訴真宰。

午節

晝永風薰午節臨，葵榴此日更精神。謀生已分同芻狗，厭勝無勞結艾人。包黍盃棹遺俗舊，浴蘭兒女彩衣新。老夫不解追時序，靜讀離騷弔楚臣。

弭楫

弭楫望清川寒暉淡將入候暖葉未變天回鴈仍急荒
村雞豚瘦夕露煙火溼萬物感徂年軫念追前集脈脈
蘊言外臨風勉離立

和友人韻

瘦筇便領鶴攜食任無魚老去詩多拙貧來客自疎嚴
陵終獨釣枚乘只安車委命存窮達吾生亦宴如

和湛淵白州判見寄弔鶴詩二首

養爾山中伴百齡偶因飄瓦便傷生酒闌尚憶梅邊舞
月冷空遺操裏聲已斷莊生憂射矢謾傳周穆化巡兵
西風一片淒涼意鮑照才高賦不成

頂丹不得駐修齡誤却相期共此生處士今無隨野步
仙人難復致簫聲曾聞弔墓辭陶母偶為乘軒阻衛兵
幣果玄黃齋送去華陽真逸已銘成

河橋別友

短日新霜急暮年傷心此別見無緣孤帆自入寒煙去

知向何村泊夜船

賦童梅巖隱居圖

龐公不愛入州府自結衡茅住山塢蒸梨炊黍飽妻兒
幽事無人繼前譜梅巖愛山存古心卜築更向青山深
區區世事不挂齒晝夜讀書松竹林永讓盧鴻傳十志
圖此知君有真意山中之樂何其多白髮心違我應愧
和落紅詩韻

開謝匆匆本化工曉霞吹散失芳叢可堪長吉心判醉

誰悟靈雲色是空
鴟鴞自傷三月暮
詩人錯恨五更風
倚闌獨客愁如海
夢入回文織錦中

題周法師月溪圖

冰霜萬里弊貂裘
炊熟黃粱認舊游
坐看清溪溪上月
虛舟不動水悠悠

和春晚詩韻

一天飛絮草堂低
三月風光爛熳時
為僕老種花迷向背
童癡沽酒任醇醅
且將白眼聊從俗
難覓黃金可樂飢

傳語東君好歸去今年懶作送春詩

霞外詩集卷九

欽定四庫全書

霞外詩集卷十

元馬臻撰

題玄覽真人溪月圖

溪風灑露兮弦月承雲儼真人之宴坐兮存夜氣之氤
氲隘城郭之窘窘兮結塵夢而方殷

送自誠真人回秋溪普門舊業二首

新詩吟得送詩僧寺憶秋溪到未能依舊入門風景在
心明不昧佛前燈

歷遍諸方合是歸
津津喜色到家時
殷勤問訊山中月
曾照青松長舊枝

和王仲道明府隱居詩韻二首

身世誰能定卜居
小舟風急信蘆簾
蓴鱸味美歸張翰
詩禮家傳見伯魚
春靜西湖勞杖屨
道閒白日且琴書
利名蠻觸非吾事
滿耳松濤晝睡餘

瘦竹勝巢笑拙鳩
倚闌閒為晚風愁
士貧始見身為寶
齒落纔知舌尚柔
靖節琴書三徑草
玄真簾笠五湖秋

相逢各自頭如雪
指點江山說舊遊

次筠軒詩韻

幽軒列萬竹
愜此冲澹襟
乃知心跡遠
不在山林深
客散動秋影
鶴歸分夕陰
至樂寓言外
任鼓昭文琴

再題白湛淵買宅圖後

靜者貴行止
即事在厥初
君家鄉黨敬
稱善真不虛
昔我當青年
寫君買宅圖
清風羅竹樹
曲沼蔭遊魚
嘉賓沓然至
日以清事娛
稚川昔移家
提挈何區區
少陵得

草堂經營三載餘東野亦移家家具少於車君今向人
境森爽葺其廬居安則資深無乃種德歟復見屋下郎
箕裘振文儒展卷三十載撫迹肝膽舒願保歲寒節看
教諸孫書

寄平江開元丈席恩斷江

闔閭城裏開元寺信手拈來敝法筵有道不勞方外疏
住山聊結世間緣化歸檀施僧能說詩出叢林客任傳
截斷衆流江自在恩波湛湛碧連天

敬讚純陽真人畫像

自從樹老城南月不把玄機輕漏洩
秋風千古洞庭波
是凡是聖從渠說

畫意二十二首

千樹萬樹桃花發三聲五聲鶡鴒鳴
溪山春色媚人眼
但見物物生詩情

晴雲冉冉拂空翠羣木陰陰生
夏寒弭楫攜琴訪溪叟
世塵膠擾知音難

亭亭樓觀藏山坳上有疊嶂爭秋高
支筇共語不知遠轉覺身世輕鴻毛

寒空黯淡飛鳥沒某丘某壑同一色
絕憐驢背苦吟人風雪打頭烏帽側

紅塵梅裏懶低顏石路迢遙入亂山
擬向雲邊種黃獨幾時容我屋三間

山凝太古洪濛氣一道飛泉瀉蒼翠
小樓屹立溪影中應有伊人共幽意

支筇路入諸峰頂回首繁華謝朝槿古來天下多名山
不是終南終不隱

江花江草映江樓寫出江天一片秋隔岫小橋低數尺
淡煙消處見漁舟

石逕盤盤入翠微山腰樓觀白雲飛微茫野外人煙晚
一片風帆何處歸

城中車馬自喧譁江上清風未有涯欲遂平生瀟灑志
數椽茅屋傍漁家

千章古木間青紅路接溪橋出算鐘衰老無人賦招隱
山雲更入兩三重

江村日暖春冥濛李花如雪桃花紅山長水遠望不斷
盡在乾坤生意中

吳儂生長浙江干慣見秋濤拍夜灘老去怕風兼怕水
不妨傳入畫圖看

有客騎驢入林麓山深疑是王官谷平生輸與釣魚翁
獨木橋邊結茅屋

江千秋染爛斑樹杖策幽人入雲去應是當年李謫仙
來卜匡山讀書處

數間草屋山煙靜夾岸桃花流水香愁殺武陵回棹客
不知人世幾斜陽

平生丘壑老棲遲敢信毫端為發揮忽憶楚江江上見
雙帆怗怗帶雲飛

溪翁住處臨溪水一道飛泉翠微裏西山爽氣爭秋高
樓觀參差白雲起

幽人自樂山中趣閒訪山家入山去記得西峰阿那邊
亂雲遮斷無尋處

青青疊嶂摩蒼天下有五湖煙水連漁家小橋雨新漲
扁舟繫傍茅簷邊

江雲晶晶侵林影境會心融發深省可惜長艘載利名
乾坤清氣無人領

緣溪路滑蹇驢遲水色山光總入詩還勝襄陽孟夫子
滿身風雪灞橋時

祖塋冬祀

玄冬萬物瘦拱木自青葱
感彼霜露降及茲成歲功
衣裾冒草逕枰釘羅山風
慮斷寵辱外神交生死中
念真故洒洒結抱還忡忡
音響一何寂道論嗟無同

偶成

松風寄一龕蕭瑟我相諳
雲海鷗盟冷名場蟻戰酣
履須經實地道豈事虛談
世態從欺老欣欣雪滿簪

為嗇齋呂高士寄題大瀛海道院

茫茫大瀛海羅絡后土流象山襟爵溪一點波中浮昔
日安期賣藥處至今海月懸高樹丹丘羽人結瓊居誰
道人間隔風雨三山滅沒金銀臺聞有仙人時往來仙
人不可見白髮令人哀安得再拜訴王母謫仙本是凌
雲才

挽饒國吳公二首

壽櫟仙翁八十餘泥封初拜大司徒九重恩寵光瓊圃
一段精神炯玉壺子領羣仙天上有身膺五福世間無

更聞蟄蟄傳詩禮輝映鄱陽月滿湖

高門善積異殊恩三達稱尊古不如已向晚香娛歲月
更看榮祿表鄉閭耆英社冷虛元老碧落班催覲帝居
玄德真人應壽母長生有鶴下天書

和越僧吉半雲見寄詩韻

豈有詩才逼浪仙謾教方外姓名傳句忘雕琢才幾道
理絕名言不異禪野鶴夢迷滄海事高僧吟老翠微煙
剡溪山水留佳趣為報扁舟待雪天

題草蟲畫卷

嚶嚶趯趯自知機展卷誰憐下筆時
采得國風千古意分明一段召南詩

題赤壁夜遊圖

絕壁驚濤故壘西扁舟明月夜何其
樂遊不記元豐事只有臨臯道士知

挽月泉吳提點二首

桑梓同年數不多長懷令德養天和
典刑已共推前輩

言語真能入四科心殆玄門傷舊業病侵白髮動哀歌
斯人已矣堪淒斷吾道悠悠竟若何

壯年曾約隱茅峰鵬鷖飛翔勢不同榮被宸恩敷教雨
晚安琳宇贊玄風潰癰忽悟南華旨施藥難收扁鵲功
六十八年多少事泉聲依舊月明中

深靜亭

徑曲藏林表亭孤逼水湄頓忘三伏日渾似入溝時市
遠聲不到魚馴樂自知可堪文字飲慚愧少陵詩

和秋日山行詩韻

石路遍秋草
朋簪信杖行
嶺雲隨眼變
野菊向人明
澗水流元氣
山風掃世情
誰家猶紡績
機杼隔林鳴

春日口占

豪士惜春不惜金
老夫得句如得寶
固知貧富本殊途
各向東風展懷抱

玄教大宗師張真人挽詩

秀鍾河岳氣
弧矢射生申
龍虎聯真裔
山林得偉人
垂

衣詢道德舉鶴上星辰慶際風雲會光依日月新簪裳
沾教雨砥柱屹天津望重山中相經傳席上珍談玄無
野褐論道列朝紳琳宇開張盛彤庭錫予頻累朝親眷
顧一品出絲綸忽憶三天事俄遺大患身玉棺下雲外
草座失河濱骨俗蒙甄治才涼只隱淪窮猿甘向老尺
蠖竟難伸涕泗嗟何及名言不可陳天風舊時路回首
鼻酸辛

贈別友人

湖海清秋日山林白髮翁未能從上下忍為各西東老
別驚霜草深情引斷鴻天寒物色薄搖落晚來風

讀石田詩有感三首

吟看三數過不覺燼寒燈意趣無非道交游半是僧課
書貧自樂媚竈夢何曾自後言詩輩苦心終未能

雕搜還不到姚賈是宗風勢立典刑上句存規矩中片
雲孤嶼遠寒水夕陽紅此理言難會冥心感化工

悟門難槩入轉讀轉堪傷天地因經緯風騷張紀綱高

秋明素髮老菊傲繁霜物化精神在中心何日忘

為義齋方山長賦青山白雲圖

玄英先生釣鼇手結廬正對桐江口坡陀四面環青山
山上白雲終日有青衫博士居臨安萬山遶屋心自閒
松竹林中讀書處白雲往往來其間玄英隱處昔曾見
出岫無心如有羨為與先生芳譜聯臭味相同故相戀
老我營得屋數椽錢塘湖上連秋煙青山白雲夙所愛
為君寫入圖中傳

送僧山雲上人

山僧業在山深處自縛衡茅共雲住何時杖錫下山來
錢塘煙草無心遇針芥相投杜德機山雲無侶又思歸
三盃春酒贈行色江上梅花如雪飛

和山村見寄詩韻七首

一經屹屹自窮年門巷無人問草玄安得雲龍隨上下
還憐鑿枘失方圓間關啼鳩春多恨牢落鰥魚夜不眠
萬物去來天理見薰風未必競繁弦

一舉曾聞累十觴即今酒量復誰強
聖賢趣在中清濁
鳬鶴天全任短長
靜裏支頤觀物化
閑來袖手看春忙
功成名遂身須退
千載清風綠野堂

山人夢不離山林歸隱蹉跎愧孔賓
平淡詩章心自得
空濛煙雨畫難真
室如懸磬那愁盜
語不能神懶向人
莫道無金憂不足
黃金入眼也成塵

閒愁常問竹平安
竹外樓高眼界寬
覓句不孤池夢草
休官猶得隴栽櫟
浮雲易散傷鄰叢
遂至藥難成失露盤

莫負杖藜行處樂江花江草滿江干

得失悲歡較幾何西鄰雖富不曾過昔賢已分安漁釣
貧女無心在綺羅挺挺松椿禁雪老紛紛桃李占春多
憂來俛仰人間世背立斜陽讀九歌

休將野服染緇塵大患須知為有身藥餌任從留過客
是非終不到閒人山中相隱懷弘景谷口躬耕羨子真
午睡醒來春事晚枝頭梅豆已生仁

不成一事鬢先皤朋友惻惻喜琢磨千里音書歸雁少

滿城風雨落花多
迸堦新笋微過竹
脫繭春蠶欲變蛾
惆悵少陵身老大
壯心激越醉時歌

夜坐

青燈照不寐
食晏腹猶果
開簾知夜分
片月依林墮
積雲忽如漆
老樹懸神火
遊淡遣歡戚
意足物常黠
窮達與死生
自古非獨我
胡為露電中
寸心空瑣瑣

為僧賦月巖二首

高巖挺雄姿
本根插地軸
青天月飛來
炯炯照幽獨
我

嘗觀微妙識此真面目理愜心自知慎勿語流俗

明月無古今寒巖了今古體用元不殊明晦從吞吐既
不昧本根疇能畏風雨持此問虛空虛空定相許

追和南谷杜真人山居四時詩寄昇元主席桂菴
姚提點四首

滄海雲迷鶴信稀地偏無客款柴扉碧桃開盡春狼籍
日暮采芝人獨歸

石底幽蘭隔澗香新篁楚楚出林長道人無語倚松坐

羽扇不搖心自涼

風瓢歷歷挂松梢
慙愧心難繼
許巢昨夜朝
真衣露冷
殿陰斜月轉
蟠均

笑看功名蟻戰酣
飢來自挹曉霞餐
無端靜裏生吟興
一夜猿啼雪嶺寒

再和

山桃野杏風中稀
青山對面開柴扉
家童破曉摘茶去
日午穿雲猶未歸

石泉滴滴幽草香日景陡覺山中長出門倚杖看雲起
巖壑陰風生晝涼

浮嵐半沒長松梢落日正照白鷺巢他年容我結茅屋
定知卜築青林坳

蒼苔濁酒凝醺酣山崦人家炊午食陰雲淡薄不成雪
散落下方風雨寒

和陳仲庸春晴詩韻

一榻寧無坐客羶典琴還辦酒家錢幾番夜雨東風惡

三月清明上已連汀草乍濃纔見蝶山花正好未聞鶉
趁晴莫惜尋幽步春去春來動隔年

寄題桐江鳳山寺鷺雪軒

西湖西畔茅家步鬱鬱喬松宿羣鷺自從樹老浮雲空
夢斷滄洲留不住今日桐江江上秋鳳山寺對青林幽
紛飛萬點下晴雪軒窗晝敞明雙眸物色所寓真不偶
千古煙波一回首可憐不見羊裘翁空屹高臺大江口
鷺耶雪耶心叵量倚闌對境還相忘他日滿林生竹實

會看翔鳳鳴朝陽

和蜀僧明上人詠雪詩韻二首

不教禁體犯毫纖詩令還同酒令嚴村巷漸深愁桂玉
山家任密慣齏鹽吟餘已怪冰生硯夢覺猶疑月在檐
獨有喬松丈夫氣凌寒特地傲山尖

薄雲猶見月纖纖陡覺寒威夜更嚴謝女已能吟比絮
坡仙休嘆食無鹽聚時曉徑雲生地消處晴空雨滴檐
記得當年天目頂冷歌烏帽望西尖

集句遣懷三首

懶慢無堪不出村當年心事與誰論
如今老去愁無限
雨打梨花深閉門

紅塵無處不喧譁江上無人轉憶家
寒食清明都過了
夜來風雨送梨花

且盡芳樽戀物華猩猩血染半園花
東君自是人間客
看到子孫能幾家

送蕭存遠主簿之京

交道無故新前哲有明徹解后憩寒齋水木交秋景方
君步凌雲顧我髮垂領離情霜柳斷去迤川途永金臺
多故人天風候鳬影

和山行詩韻二首

秋風吹亂山山在白雲間老木忘今古幽人自往還
餐麕糲慣樽酒語言閑悵望冲霄鶴寥寥不可攀

今朝風日好有約會詩家路勢依山盡秋聲落雁斜
淒迷孤嶼草減沒小春花人事堪誰比汀煙薄似紗

寄湖山張太監

楓葉蕭蕭霜滿林蒼煙寒結半湖陰
三冬書卷千莖雪萬里綈袍一寸心
驛路山光歸騎穩天門春色景雲深
終看衣錦行清晝乾鵲枝頭聽好音

村行遣興

物色憐人意逢迎似有期
野鶯啼半日山客聽多時
崖蜜攢花就村橋架竹為閑心
與閑景未必市廛知

題山陰回棹赤壁夜遊圖二首

夜雪蕭騷入剡溪高懷忽起故人思當時興盡不回棹
千載誰傳一段奇

穿空亂石驚濤拍月滿孤舟從二客覺夢悲懽總不真
一聲鶴唳東方白

觀周景遠御史題讚雲叔羅教授喜容三首

十年訣別萬山翁翰墨淒涼到眼中軒冕不移湖海志
即今還有幾人同

仁義根心禮數寬常言懶著惠文冠不知墓石誰人誌

潛德應傳後世觀

新城昭諫耳孫枝雞黍情親更不疑貌得真成曾著語
平生言行只君知

送本初朱提點之玉隆主席五首

風虎雲龍會有期文章道德際清時名山正要名師住
喜捧天書下玉墀

衛道金湯佐上玄袖香常近御爐邊仙人出應龍沙合
合主林泉五百年

自憐學道晚無成
華髮蕭蕭不受春
多謝東風湖上柳
每開青眼盼陳人

蕉池月冷憶論詩
別去無端信息稀
衮衮相逢又相別
一江春水看帆飛

笙鶴遙知出郭迎
歡聲雷動豫章城
碧桃開盡春山晚
驛騎還催上玉京

送姑蘇權中上人回江陰禪香寺二首

深省楓橋半夜鐘
禪香得業早心空
無端踏遍錢湖月

又覓新詩送遠公

杖錫秋風去住輕
諸方解結慣曾經
依然舊業歸來好
庭樹森森柏子青

和黃瀑翁寄弔龔巖翁畫馬詩

續補入有序

大德丁未黃瀑翁寄弔龔巖翁畫馬詩因路雲
溪過西江訪李鶴田請同賦明年路雲溪回杭
瀑翁首出此卷索和章余於巖翁久敬不忘故
拭淚次其韻以重存歿之感焉

吾聞曹韓之馬筆力相承如有待能使畫師神色改一
落人間五百年珍襲如今復誰在髯鬣貌得霜雪蹄曹
韓無詩不敢齊神龍變化叵易測似聞展卷空中嘶竭
來初放行天步萬里關河夜飛渡下慚俗馬相驕矜金
羈但識西湖路猛氣尚欲超滹沱春風苒蒨生意多匡
廬老仙得此畫迸淚激越成悲歌歌成惆悵翁仙去價
直千金那忍顧殷勤寫挂墳樹枝不知冥漠能知不

送陳渭叟之涇縣崇玄觀主席

葛翁川上一道士形臞貌古神仙似手持九節瘦竹筇
來覓籌峰計然子計然仙去白雲深又束琴書尋舊林
武林城中訪親故鶯啼燕語尋春算小將詩酒送平生
煙雨西湖掉頭去有才還接謝宣城羣仙已草新宮銘
紫府真官儼環珮鏗金戛玉相逢迎昔年東海釣鰲客
白眼看人九州窄涇谿山水天下奇到今勝處多行迹
金鰲峰白鷺洲請君放意隨天遊山邊水邊見明月為
余問信敬亭秋

山行口占

一簇人家島嶼煙紛紛兒女開茶園西峰應有夜來雨
添得門前澗水喧

和張仲舉書齋詩韻

彬彬人物畫圖間一室絃歌白日閑授業儼如承闕里
讀書何必向匡山青雲有路君高步華髮無成我覩顏
看取姓名題雁墻柳條留待贈行攀

偶成

樓頭疊疊來青山開軒為我一破顏城中合沓十萬戶
奔趨慶弔無時閑老夫七十今踰一誰能對此長戚戚
但恨難逢阮步兵眼底看朱却成碧

歲晚喜友人至

之子來何地江山復暮冬船明依岸火人靜隔城鐘野
俗樽壘古衰年筆硯慵北風吹正急此別欲何從

歲暮雪霽書懷

雨雪交玄陰崢嶸送殘歲雪霽湖水涸寒風四山至林

莽就摧折凍雀聲瑣碎魚蝦不足數快意鳬鷺輩詩翁
骨肉瘦坐久白髮脆老竹垂寒姿小草足生意大哉乾
坤中萬物自榮悴物理固莫奪慨慷激心志嘗聞是為
非復見非為是不如飽煨芋一覺和衣睡

山居即事

茅齋低小山意深琴書老罷驚流陰食貧不愧乞米帖
才薄喜無諛墓金兩峰隱約煙冉冉古木擁腫春沉沉
吟梅處士難復見日暮啼猿傷客心

龍虎山彭法師禱雨感應六首

一夏經秋亢旱災稻苗田上盡枯發生民莫謾心荼毒
真士新從福地來

海嶽崇深禱不神宿逢箕畢也難憑道傍暍死嗟何及
赤脚徒思可踏冰

真士能推濟物仁夜通封事格天臨扶搖九萬誰云遠
響答惟存一寸心

載展玄旗結畫陰令牌三擊鬼神聽木郎不待商羊舞

雨脚浪浪似建瓴

雨勢翻空走迅霆萬人回首沸歡聲秋風會待登場日
比屋炊煙樂太平

教行正一闡真風雷令初傳出巽宮一滴天瓢蘇萬物
可憐真宰不言功

挽趙天錫都事

白髮星郎學問精大江南北播芳聲治家道在持心正
佐省人稱泣事明萊氏逸妻先易簣徐卿令子已成名


綠波春草靈輶去淒斷鄉中父老情

挽鄉友徐和甫教諭

同里同年值德鄰南州高士定前身
病懷猶說科名事
友誼渾如手足親
子姪團樂家有慶
膏肓上下藥難神
虛堂他日重相過
弔影驚心是古人

湖上春日遣興六言

夢覺笙歌聲裏人
老湖山畫中花
意欲回夜雨詩情不
讓春風



霞外詩集卷十

霞外詩集跋

虛中錢塘族也少時慕陶貞白為人師碩翁著道士服
隱於西湖之濱嘗畫衆乾龍門二圖流傳海內不見者
輒以為恨既從褚雪巖游肆力吟事風致酷似中州諸
名家伯雨之後復有虛中何錢塘多隱君耶海虞毛晉
識

